

KONTROL MOZIOA

Kultur jarduerak egiteko prozedurak errazteari dagokiona

Amaia Almirall Lopez de Luzuriaga EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2017ko ekainaren 19an Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

Donostiako kultur ekintza aberasten duten eragileen zerrenda anitza da: Udaleko arlo eta erakundeetatik hasita, ekimen pribatutik aritzen direnak, eta herritar zein elkarte eta mugimendu andana. Behin-behineko jarduerak egin ahal izateko prozedurak eskuratzeko zailtasunak gainditzea izan du helburu Udalak, besteak beste, kultura arloan duen eraginagatik. Sinplifikatze horrek erraztuko lukeelako kontzertu edo antzerki txikiak hainbat establezimendutan egitea, edo erakusketak ohikoa ez diren lekuetan zabaltzea, eta abar.

Beraz, eta arestian aipatu den helburua presente, aspaldian hasi zen teknikarien aldetiko lana, nahi baino motelago joan den arren. Abiadura horrek, hain zuzen ere, bide eman zien talde honek aurkezturiko ekimen batzuei. Ildo horretatik, iazko maiatzaren 6ko interpelazioaren ondoren, Udal Gobernuak iragarri zuen baimenak errazteko prozedura martxan jartzen zuela 2016ko maiatzaren 17tik aurrera. Alabaina aurtengo maiatzean zabaldu den informazioaren arabera, kontzertu txikiak antolatzen aritzen direnen arteko iritzia ez da oso positiboa gai honek izan duen garapena dela-eta.

Informazioak kontrastatu nahian, baimenak eskuratzeko prozeduraren egoera zertan zegoen arakatu nahi izan dugunean, emaitza oso sinplea izan da: ez dago aurkitzeko modurik, ez Udaleko orrian, ez Donostia Kulturako orrian. Hau guztiz kontra doa, lehen azaldutakoari dagokionez, hala nola Udal Gobernuak bere buruari jarritako bi agindu zehatzei begira:

- 1, "Hiriko kulturaren sustatzaile pribatuen lana erraztea izapide burokratikoak sinplifikatuz, espazio publikoen erabilera ahalbidetuz eta udal ekipamenduak erabiltzeko, eta ahalik eta gehien lagunduz mota guztietako ekitaldi eta ekintza kulturalak antolatzeko; izan ere, horien bidez nabarmen aberasten da hiriaren

eskaintza kulturala eta lanpostu eta aukera berriak sortzen dira industria kultural, artistiko eta berritzaileen inguruan, bereziki artista eta sortzaile gazteentzat.”

2, - “Udal-webgunea birdiseinatzea, pertsonak behar dutena ahalik eta modurik errazenean aurkitzea lortzeko.”

Horiek horrela, ekainean interpelazioa aurkeztu dugu gaia argitzeko asmoz. Helburu konpartituak izanik, urtebetean berau ez burutzeko arrazoa jakin nahian. Bertan emandako azalpenek gaia arazo informatikora bideratu zuten; esteka baten gorabehera, justu ondorengo egunetan konponduko zena. Eta interpelazioaren ondorengo egunetan baimena eskuratzeko aukerak ibilbide desberdina izan dute udal web orrietan.

Jarduera egiteko tenorean hasiko denak halabeharrez ez du jakingo nora jo behar duen, eta akaso ez du Udaleko egitura zein den ongi ezagutuko, eta abar. “Prozedurak erraztea” helburu, beraz, Donostia Kulturako zein Udaleko web orrietan bete, eta bien arteko loturak ziurtatuak egon beharko dira, noski. Donostia Kulturako orritik hasita, nobedadeak izan dira eta baimenak eskuratzeko lotura egon badago; erraz ote dagoen, eta erraz lor daitekeen, baloratzea subjektiboagoa izan daitekeela.

Aldiz, Udaleko webguneari dagokionez, aurrerapenak ezin dira nahikotzat jo. Izan ere ondorengo egunean, ekinaren 20an barne postaren bidez helarazi zitzaigun Udaleko Tramiteen Eskuliburuaren berri eta Udaleko webgunean Tramiteak argitaratu berriko datu basea esekita zegoela. Arretaz begiratuta, zerbitzuetako orrietan zeuden tramiteak orain multzoka berrantolatu direla konprobatzeko parada izan dugu. Grafia eta ikono berriagoak erabilia, Udal Gobernuak aukeratu duen irudiarekin bat etorrira, denborak esan beharko du ea itxura berriaren bidez antolatu den eskemaren arabera herritarrek bilatzen dituzten tramiteak errazago aurkitzen dituzten. Edozein kasutan eta oraingoan aztergai den kultur ekitaldiak errazteko baimen mota honi dagokionez, aurkikuntzak lehen bezala darrai, alegia, ezintasunean. Udaleko “tramiteak” espazio berrian ezin da kultur jarduerak egiteko prozeduretara ailegatu.

Azalpenak jarri ote diren ezin da jakin, baina bai helburua oraindik ere bete gabe dagoela: hiritarrentzat eta kultura eragileentzat kultura-jardueretarako baimenak eskuratzeko prozedurak (zein den, nola eskuratu behar den, nora jo behar den, eta abar) ez daude Udaleko web orrian eskuragarri. Besterik ez bada, eta helburua osorik betetzen ez den bitartean, ekintzaileek nora jo dezaketen eskura jartzea ez legoke soberan, galderak egin ahal izateko eta zalantzak argitzeko, baina Donostia Kulturako web orriarekin lotura egingo duen esteka edo telefonoa edo posta helbidea ezin aurkitu. Kulturako gaia izanda ere, Udalak dagokion garrantzia eman behar dio, guztiok konpartitzen ditugun helburuak bete nahi badira.

Horiek horrela, hauxe da behean sinatzen duen zinegotziak aurkeztutako **KONTROL MOZIOA:**

1.- Udalbatzak hertsiki eskatzen dio Udal Gobernuari, kultur jarduerak egiteko beharrezkoak jotzen diren izapideak erraz eskuratze aldera, beharrezkoak diren baliabideak jar ditzala, bereziki informazioari dagozkionak eta Udalaren web orrian eseki ditzala erraz aurkitzeko moduan.

2.- Udalbatzak hertsiki eskatzen dio Udal Gobernuari, kultur jarduerak egiteko beharrezkoak jotzen diren izapideak erraz eskuratze aldera, dagozkien informazioak Udaleko web orrian kokatzen ez diren bitartean, Donostia Kulturako web orriarekin lotzeko aukera erraztea edo harremanetarako telefono edo helbide elektroniko zuzen bat jartzea azter dezala.

Donostian, 2017ko ekainaren 23an

Amaia Almirall Lopez de Luzuriaga
EH Bildu udal taldeko zinegotzia